

Gaston LUCY (1898-1986)

Pou bramint des djins, Gaston LUCY, pu counu coume « Lu Singlé », ére in spécimen in pô sbarant, mistèrieu, impressiounant, ki counichot ttafwêt sur la nature, les plantes, les mouches, les léjandes, les pépés et les djâbes, l'êwe èt la baguète...

Tout d' in côp, rabôré dins sa ptite mâjon, tout d' in côp, courant l' pays à mobilète, c'ére èn' Ardènès et in Walon dins l'fond dl' âme, Gâlwas d'orijine, Cèlte du souche (n'ôrot-i nin sté in pô druide), Gaston , pou nouzôtes, ç'astot in pô nost' Astérix .

Il avot v'nu å monde à l'fin du siêke passé; su pére ére du Bîve; sa mère, du L'forêt. Il astot don toûrné du pus su la Smwas ku su Lèsse.

Trop spécial pou s'marier, il è passé ène vîe du nomâde, furtant tous costés, fujant 36 mustîs, mês ruvnant toudis ou paysis.

En 1919, il est al terrasse su la ligne, pî, i va rbouchî å tranchées dins la Champagne; duvè 1927, i passe in terme ou Congo et an Afrique à monter des vôyes pou les trins. I câzot coume les nègues, et c'ére toudis en kiswahili k'i ruspondot cand on li pôzot éne kestion in pô jinnante. Ses prumîs scrîjadjes datat d'adon, su les crwayances du Congo.

Ruvnu poul Çantnêre, il astot fièr de raconter k' il avot dèfilé à Bruxelles, avu les Beaulieu, coume autourî (fauconnier)

Dju sans adon an 1930. I ratake adon ène nouvèle vie et i voyadjrè d'ène place à l'ôte, à tirer âs pîres, à planter âs sapins, su les travôs; il è minme oyu in camion pou monner âs pîres ét âs cartouches.

Il achèvré à l'comune, coume cantonier et fossî al çumintîre.

La guêre du 40/45 l' è vû duvnu rèsistant, pou les messadjès à passer. I s'è catchî in moumint à France, à l' frontière. Après la bataye d'Hodrémont, lu 23 d' aousse 1944, il est hapé coume otadje avu les ôtes, passe pa Dinant, Namur et Lîdje pou fini à Beverlo et z' î esse rulâtchî pàs Anglès. Il avot yu la chance, coume mwintes ôtes, ku s' trin n'è sû pârti à timps pou l' Almagne.

Gaston su tnot à courant du tous les nouvès cayèts. C'est loû k' è yu la prumîre tèlevizion d' Bîve ; il avot Kodak et camèra, projecteur et tout l' tremblemant, sins pou ostant sawè toudi s' à-n êdî.

Après la guêre du 40, il è nn'alé d' leu mâjon pou v'nu d'mèrer à l' gâre de Graide, dins ène putite cambuse, su ène fôsse vôle, à 200 m. du nouzôtes.

Il î astot à l' dicâce, ou mitan d' ses tchins, du ses tchèts et du ses mouches. Sa mobilète lu monnot partout, à rkèru des vîs lîves û à taper la baguète.

Du Congo, Gaston avot ruvnu avu ène sinte vessète dul tounoûre. Al' prumîre nwâreur, il abizot dlé nosse mère.

C'est come çà ku, ptit à ptit, on-z è duvnu soçons. I câzot des plantes, m' a rapwârtot pou les rcouniche; câzot des vîs lîves, mu djot c'est ki falot achter, m' a moustrot pa des côps ynk. Il è falu l' timps pou s'aprovijî.

Al longue, Gaston è fini pa z'awè confiance; il avot trouvé dlé mi l'êde k'il avot dandjî. A duvnant vî èt dvant d'intrer ou hôme, i m'è lêchi ses rlikes..

Gn' avot du t'tout. La Bibe, lu Koran, la cabale, les croyances, la vîe des Saints, des lives d'èglie, des lîves du scole, des lîves du guêre, sul' folklore, su l'Ardène, su les viadjes, su l'histwâre, su les lingues, su l'walon surtout.

A costé d'çà, des vîyes gazètes, des vîs scrijadjes, des vîs dictionêres, raglanés in pô partout, et tout çà malèreus'mint dins èn état bin souvint déplorable. Lu principal, c'ére dul z-awè wârdés.

C'est là ddins k' i poûjot les flâwes et les artikes k' i pwârtot adon à Saint-Hubert, amon Gofflot, ki les publiot dins PresseAnnonces , les Echos de la Cité et co dz-ôtes

Dins tout ç' ku l'Gaston è scrit, on put rut'nu :

- Ene masse formidable d' artikes k' ont paru dins la Gazète du St Hubert, duvès 1960-1980
- In pakèt du flâwes, rasannéyes et r'tapées pa Yves Joblin, du Paliजू.
- Lu walon d'Bîve et d'alantou (6.594 mots), in motî raglané du ses vîs cahiers du scole, nin achèvés, rataqués à l' aviêr, sucrits à l' aduvnant, coume lu vant vnot et k' Excel è parvunu malgré tout à rmète du sgure.
- « Les Grignoûx », in roman su des vîs fêts du ddins l'timps

Tout çà, Gaston nous l'raconte coume ène grand'mère à ses ptits afants, dins in câzadje ku tout l' monde comprind. Avu sa malice, i rtrace les caractères des djins, leus kalités, leus dèfôts èt il è bin du plêji cand i sé djouwer in bon tour ou djâbe.

Lu Gaston supwârtot malåjîmint les françès èt leu lingue; i s'rèvoltot du vèy lu walon mètu à må pa des çîs ki nul counichint nin, pou mète al place ène lingue ki n'astot ô départ k'in djargon du l'Ile-du France.

Sitot k' ène afwêre nu lî plêjot nin dins in live françès, i n' hèzitot nin à scrire su ène foye du lîve, cè k' il a sondjot et c'ére bin souvint yåk du bin pikant.

Tout ô long d'sa vîe, lu Gaston nu s'èst jamwês duspôrtu du c' t' idéye là, ku l' walon valot n'importe ké câzadje èt k' i n'avot à roudji du rin, ni d' nolu.

Et cand l'Gaston avot ène idée ...!!! i falot mî lî lêchî !

Pou fini, dijans ku l'Gaston avot wârdé, du l' èducation ku su pére et sa mère lî avint d'né, la fwa in pô catchîe, mês combin ardante du ses vîs parints, sa plinne confiance ou « Grand Mwêsse », coume i L' loumot et èn atachmint profond à ses mwârts, loû ki, lontins, les î è rindu l' dêrin dvwar.

Çà ossi, fujot partie du « Singlé ».

23.03.1996. L.BAIJOT.

Çu tecse-ci, dju l' ê dit à in raploû ku Lucyin Mahin avot mètu su pîd al sucole du Glêreuse an 1996 et k' i m' avot dmandé d' rèdijer an homadje ou Gaston. Dju lî dvos bin ça. L.B.